

Date – 25/02/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Mizoram tlawha lo zin mek 16th Finance Commission member-ten Chief Minister leh sorkar official te an kawm.**
- 2. Directorate of Science & Technology hmunhmaa khawchin thlirna-IMD centre dinna tur inremna MOU ziah a ni.**
- 3. Prime Minister Narendra Modia chuan hmarchhak state te chuan hmasawna kawngah bung thar an kai dawn a ti.**
- 4. Prime Minister Narendra Modia chuan khawvel puma chhungkaw choka tinah ramchhung loneitute thil thar pakhat tal awm tir chu a hmathlir a nih thu a sawi.**

<><><>

FINANCE COMMISSION

Mizoram tlawha lo zin mek 16th Finance Commission member-te leh Chief Minister leh a thawpuite nimin khan Secretariat Conference Hall, MINECO-ah an inkawm a,

Chief Minister Pu Lalduhoma chuan an inkawmna hian Mizoram tan hmachhawp duhawm leh hmakhaw eng tak a siam phah ngei a beisei thu a sawi a. Mizoram leilung zau zawng za zela 84 chuang chu ram ngaw in a tuam thu sawiin leilung hausakna, thing leh mau leh nungchate chenna hmun pawimawh tak a nih bak ah boruak thianghlim petu leh sik leh sa inthlakthleng nasa lutuk tur vengtu pawimawh tak a nih thu a sawi a ni.

Pu Lalduhoma chuan Mizoram chu tribal hlang deuh thaw chenna, kut hnathawk a inngnat tamna State a ni chungin India ram ah ziaak leh chhiar thiam tamna State a nih bawk thu a sawi a. Amaherawh chu ram leilung pianhmangin a zir loh avanga inkalpawhna kawng a harsatnate, hmanraw man sang avangte leh Industry lian behchhan tur a awm loh avangtein hmasawna ruangam duang tur chuan Sawrkar laipui puihna a tul fo thu a sawi.

Chief Minister chuan Mizoram sawrkar sum lu za zela 83.56 bawr vel chu Tax Devolution leh Grants-in-aid a nih thu sawiin za zela 16.77 vel chauh State chhung atanga hmuh a nih thu a sawi a. State dang a thleng zen zen lo, khuarel chhiatna leimin, ram kang, tui lian leh ruahtui tam vang a harsatna thleng thin te chu Finance Commission chuan a ngaih pawimawh sak a tul thu a sawi.

He hunah hian 16th Finance Commission atangin thalaite thiamna leh theihna (Skill Development) tih pun a nih theih nana rawtna te, Mau hman tangkai lehzual dan ngaihtuah tur a rawtna te, Nursing school leh College

changtlung kalpui zel tur a rawtna ngaihthlak a ni a. Mizoram sawrkar atanga rawtna hrang hrangte chu an zirchian tur thu sawiin Mizoram sawrkar ina an lo dawnawm dan chu lawmawm an tih thu an sawi. 16th Finance Commission-te hian India ram State hrang hrang zirchianna hi kalpui mekin State 18 an tlawh kual tawh a, Mizoram hi State 19 an tlawhna a ni.

16th Finance Commission atanga lo kalte hi Chairman Dr. Arvind Panagariya bak ah member dang Pu Ajay Narayan Jha, Pi Annie George Matthew leh Dr. Manoj Panda-te niin, official pawimawh dangte'n an rawn tawiawm bawh a ni.

Nimin vek khan thuthar thehdarhtute kawmin 16th Finance Commission Chairman Dr. Arvind Panagariya chuan Mizoramin ei leh bara hma a sawn theih nan a ram leilungin a ngah sa, mau hman tangkai a pawimawh tih a sawi.

Akashvani corr zawhna chhangin FC Chairman chuan mau chu company thenkhatin bungraw siam nan ber an hmang a, Mizoram leilungin a ngah sa mau chu heng company te hian an lei duh ngei ang a ti a, Mizoram chu infrastructure ah ala hnuful em avangin mau techu sawngbawl zung zung a la harsa a, Hemi kawnga hma la tur hian Mizo entrepreneur te an pawimawh hle a ni a ti. FC Chairman chuan ram ei leh bar, sum leh pai leh chhiah hman tangkai dan hrang hrangin hma a sawn theih nan state danga an tih ang bawkin Mizoram sorkar rawnin an lo zin tih a sawi a. Finance Commission chuan thingtlang leh khawpui chhunga tualchhung inrelbawlina, chhiatrupna thlen thulha sum hman tur bakah damdawi inenkawlina leh zirna atana hmasawna hnathawh hrang hrang atan sum an pekchhuah thin thu a sawi bawh a ni.



FINANCIAL LITERACY WEEK 2025

Reserve Bank of India buatsaih, Financial Literacy Week chu “Financial Literacy – Women’s prosperity” tih thupui hmangin nimin khan Larsap Gen (Rtd) Vijay Kumar Singh chuan a hawng.

Larsap chuan Financial Literacy Week buatsaih ani chu lawmawm atih thu sawiin Sum leh pai enkawl dan dik hriat tawh loh avangin harsatna hrang hrang a tawh theih a ti a, Tunlai khawvelah UPI hmangin pawisa inpek a awlsam tawh a, hemi avang hian pawisa ip atanga pawisa phawrh kherlo in tam tham tak pawisa a hman theih tih hriat a tha a ti a, Sawrkar laipuiin kum 2047-a ram hmasawn a nih tumna – Viksit Bharat ah pawh sum leh pai enkawl dan dik hriat hi ngaih pawimawh ani tih sawiin sawrkar laipui pawhin mipui ban phaka awlsam turin thil hrang hrang a buatsaih thin tih a sawi.

Larsap chuan hmeichhia ten Bank account an neih theih nan leh anmahnia sum an khawl theihna tur hrang hrang sawrkarin a ruahman a ti a, mipui mimir hmasawna chu sawrkar ngaih pawimawh ani tih sawiin hemi ti hlawhtling tur hian Mizoram state chhunga Bank leh Financial Institution zawng zawngte chuan mipuiten Bank an dawr vek theih dan turte, beisei awm ten sum peipun dan leh an khawl theih dan tur kawnga kawhhuhtu ni turin Bank hrang hrang te tan la turin a sawm bawh.

Pu T. Lhungdim, General Manager leh Officer-In-Charge, RBI Aizawl chuan Kum 2016 atangin RBI chuan Financial Literacy Week a hman thin thu sawiin hengah hian tum bik neiin, thlan bik mipuite zingah an mamawh zirtirna an pek thin thu a sawi a, a tum ber chu campaign chhunga inzirtirna pek tur bik thupui siamte chu mipuite zinga a tam thei ang ber thehdarh a nih thu sawiin RBI chuan tunkar chhung hian sum leh pai inzirtirna tur thlanbik thupui Mass Media Campaign hmangin inzirtirna hi a thehdarh dawn thu an sawi bawk.

<><><>

IMD

Meteorological Department, Ministry of Earth Science leh Directorate of Science & Technology, Government of Mizoram te chuan Directorate of Science & Technology hmunhmaa IMD centre dinna tur inremna (Memorandum of Understanding) an ziaak.

Inremna hi nimin khan CM Office-ah Chief Minister Pu Lalduhoma hmaah Directorate of Science & Technology aiawhin Chief Scientific Officer Pu H. Lalsawmlianan a ziaak a, IMD aiawhin Pu Sudheer Kumar Dwivedi, Director, IMD in a ziaak a ni.

Chief Minister chuan, tun hma chuan sik leh sa a dik a, kan pi leh puten ruah sur hun te, thli tleh hun te an nei thliah thliah a, an hming te an phuah a, an beisei hunah tak a lo thleng zel thin. Vawiinah erawh chuan chung lo sawi lawk theih sik leh sa hun bite chu an mumal hlei thei tawh lo va, science thiamna hmanga inbuatsaih loh chuan thil hriat a dik hlei thei tawh lo a ni a ti a, he MoU hian chu mi kawngah chuan nasa takin a tanpui dawn a ni, a ti.

MoU angin Beraw Tlanga Science & Technology Centre ah IMD Centre din a ni ang a, IMD hian Mizoram sawrkar hnenah Meteorological data a pe thin ang. Weather forecast leh report dik leh rintlak zawk a neih nan hman a ni dawn a ni.

MoU ziaak lai hi Director General of Meteorology (IMD) Dr. Mrutyunjaya Mohapatra pawhin Video Conference hmangin a rawn zawm a ni.

<><><>

AIZAWL DAY

Ni 3 chhung aw h Aizawl Day lawmna vawiin hian tan a ni dawn a, Aizawl Municipal Corporation (AMC) bultumin vawiin chawhnu dar 2:30 ah Aizawl Sipai lammual ah hawn a ni anga, Aizawl Mayor Pu Lalrinenga Sailo chuan a hmanpui ang. Mayor hian he hun chhim tur hian mipui a sawm nghal bawk.

Aizawl Day lawm chhung hian intihhlimna chi hrang hrang a awm dawn bakah, Mizoram zaithiam lar tak tak te an zai dawn bawk a ni, he hun ah hian Exhibition chi hrang hrang en tur leh lei tur bakah eitur chi hrang hrang zawrhchhuah a ni ang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

PM

Prime Minister Narendra Modia chuan hmarchhak state te chuan hmasawna kawngah bung thar an kai dawn a ti. Nimina Jhumoir Binandini programme Guwahati a neihah he thu hi sawiin Pu Modia chuan Assam leh North east hmasawna chu ngaihthah anih thin thu a sawi a ni.

He hunah hian Assam CM Himanta Biswa Sarma pawhin thu sawiin Prime Minister Modian an state a flawh thei chu lawmawm a tih thu a sawi a ni.

Prime Minister Narendra Modia hian ni hnih cham turin nimin khan Assam a thleng a. Guwahati-ah Jhumoir Binandini Programme a hman bakah hian Advantage Assam 2.0 Investment and Infrastructure Summit vawiina neih turah a tel dawn bawk a ni.

Nimin tlai vek hian PM Modia hian Advantage Assam 2.0 Summit atana exhibition a hawng dawn bawk a ni..

<><><>

PM

Prime Minister Narendra Modia chuan khawvel puma chhungkaw choka tinah ramchhung loneitute thil thar pakhat tal awm tir chu a hmathlir a nih thu a sawi.

Pradhan Mantri Kisan Samman Nidhi scheme installment 19-na Bhagalpur atanga pekchhuahna hun a hmanpuinaah he thu hi sawiin Pu Modia chuan sawrkarin agriculture atanga thil tharchhuahte rmpawna thawnehhuak turte, tha taka sawngbawl tur leh hralhna kawngah awlsamna thlen turin theihtawp a chhuah a ti a. Nimina PM Kisan Samman Nidhi scheme semchhuah hi loneitu vaibelchhe 9 leh nuai 80 chuangin an dawng a. Nimina semchhuah hi cheng vaibelchhe 22,700 a tling a ni.

<><><>